



# Aonad 8

## Bileog Oibre

### I dtús báire

**A** Ar ball beag, beidh tú ag amharc ar agallamh ina ndéanann Gráinne Ní Ghilín cur síos ar a taithí féin ar an Ghaeltacht. Sula n-amharcfaidh tú ar an mhír físe, déan iarracht leaganacha eile de na frásaí thíos a sholáthar.

1 Chuaigh mé go dtí Coláiste Gael Linn \_\_\_\_\_

2 Ba ghnách leis na múinteoirí a rá linn \_\_\_\_\_

3 De réir mar a chuaigh an t-am ar aghaidh \_\_\_\_\_

4 Chuir mé fúm i \_\_\_\_\_

5 Chonacthas dom \_\_\_\_\_

6 Ag insint siollóg dúinn \_\_\_\_\_

7 Tá cuid mhór de an ceantracha á dtréigean \_\_\_\_\_

**B** Anois, pléigh an méid atá scríofa agat leis an duine in aice leat. Éistigí leis an mhír físe agus déanaigí nóta de na leaganacha a bhí in úsáid ag Gráinne. Ní gá go mbeadh ciall na bhfrásaí díreach mar an gcéanna leis na frásaí thuas ná leis na cinn a bhí agaibhse.

### Cluastuiscint

Amharc ar an mhír uair amháin eile agus scríobh ceisteanna atá fóirsteanach do na píosaí eolais thíos.

1 \_\_\_\_\_

Dhá bhliain déag.

2 \_\_\_\_\_

Gaeltacht Dhún na nGall.

3 \_\_\_\_\_

Nach dtuigfeadh sí an teanga agus nach mbeadh go leor den teanga aici lena labhairt.

4

---

Gur labhair ach an duine Gaeilge agus go raibh focal Gaeilge acu ar ach an rud.

5

---

Conamara.

6

---

Níos mó tacaíochta ón rialtas.

## An ghramadach: míreanna coibhneasta

---

Baintear úsáid as míreanna coibhneasta le nasc a chruthú idir dhá chlásal.

An Príomhoide. Chuir sí tús leis an chruinniú.

An Príomhoide *a* chuir tús leis an chruinniú.

### An mhír choibhneasta dhíreach

Is ‘a’ + séimhiú a bhíonn in úsáid in abairtí dearfacha in ach an aimsir, seachas na heisceachtaí seo:

- An briathar ‘bí’ san aimsir láithreach: ‘Fadhb *atá* le socrú go fóill.’
- An briathar ‘abair’ in ach an aimsir: ‘Fear *a deir* rudaí conspóideacha, corruair.’
- Roinnt briathra neamhrialta san aimsir chaite: ‘An t-airgead a fuair siad ón Rialtas.’
- An briathar saor san aimsir chaite: ‘An leabhar a foilsíodh anuraidh.’ \*

\* Bíonn séimhiú ar fhoirm aimsir chaite an tsaorbhriathair i gcás na mbriathra neamhrialta seo a leanas: bí (bhíothas), cluin (chualathas), feic (chonacthas), tar (thánagthas), téigh (chuathas).

### An mhír choibhneasta indíreach

Is ‘a’ + urú a bhíonn i gceist in abairtí dearfacha in ach an aimsir seachas an aimsir chaite. Is ‘ar’ + séimhiú a úsáidtear san aimsir chaite ach amháin i gcás roinnt briathra neamhrialta.\*

- Fadhb *a mbíonn* trácht uirthi go minic.
- Gealltanais *ar chuala* muid a leithéid cheana féin.
- Albam *ar bronnadh* duais air.

\* Is iad seo na briathra neamhrialta a n-úsáidtear ‘a’.

- Bí: Cá háit *a raibh* Tomás ar saoire?
- Déan: Cad chuige *a ndearna* tú sin?
- Faigh: Cén dóigh *a bhfuair* tú an t-airgead?
- Feic: Cá háit *a bhfaca* mé roimhe thú?
- Téigh: Cad chuige *a ndeachaigh* siad go Londain?

## Foirmeacha ceisteacha

Úsáidtear míreanna coibhneasta i ndiaidh míreanna ceisteacha fosta.

Caidé. Déanfaidh tú amárach.  
Caidé a dhéanfaidh tú amárach?

Féadann foirm choibhneasta dhíreach nó indíreach a bheith ann i ndiaidh míreanna ceisteacha mar ‘caidé’, ‘cé’, ‘cad chuige’, ‘cá huair’ nó ‘cá háit’. Caithfidh tú an mhír choibhneasta cheart a roghnú: ‘a’ nó ‘ar’ in abairtí dearfacha agus ‘nach’ nó ‘nár’ in abairtí diúltacha.

Seo thíos cuid de na príomhrialacha a bhaineann le cumadh ceisteanna agus úsáid na míreanna coibhneasta.

Is **mír choibhneasta dhíreach** a leanann na míreanna ceisteacha seo thíos:

**Caidé?** Caidé a dhéanann tú ag an deireadh seachtaine?  
Caidé a cheannóidh tú do do mháthair?

**Cá fhad?** Cá fhad a chaith tú thall sa Fhrainc?  
Cá fhad a ghlacann an turas 'na bhaile ort?

**Cé?** Cé a d'ordaigh na deochanna?  
Cé a rachaidh chun cainte leis an bhainisteoir?

**Cá huair?** Cá huair a cheannaigh sibh an teach seo?  
Cá huair a chuirfidh tú scairt orm?

**Cá mhéad:** Cá mhéad cathaoir atá de dhíth?  
Cá mhéad vótaí a gheobhaidh siad sa toghchán?

Úsáidtear na **míreanna coibhneasta indíreacha** i ndiaidh na bhfoirmeacha ceisteacha seo thíos:

**Cá/cá háit?** Cá mbeidh tú an t-am seo an bhliain seo chugainn?  
Cá háit ar fhan tú agus tú sa Fhrainc?

**Cad chuige?** Cad chuige a ndeachaigh sí chun na Gaeltachta?  
Cad chuige a bhfuair an duine sin duais?

Mír choibhneasta dhíreach nó indíreach a leanann ainmfhocail a chuireann am in iúl.

Cén bhliain a bheidh/a mbeidh tú críochnaithe?

Ach cuimhnigh, is mír choibhneasta dhíreach a bhíonn ann i gcónaí i ndiaidh ‘uair’.

Cá huair a dhéanfaidh tú an obair?

Mír choibhneasta indíreach a bhíonn i bhfrásaí mar seo, ina dtagann mír cheisteach roimh fhorainm réamhfhoclach nó roimh réamhfhocal comhshuite.

Cé leis a raibh tú ag obair an t-am sin?  
Cé air a mbronnfar an gradam i mbliana?  
Caidé faoi a raibh tú ag díospóireacht?

Téigh siar anois ar na ceisteanna a chum tú féin faoi agallamh Ghráinne. An gcaithfidh tú athruithe ar bith a dhéanamh i bhfianaise an eolais atá agat anois ar na míreanna coibhneasta?

## Tusa ag cleachtadh

---

**A** Léigh na habairtí thíos. Tá botúin i gcuid acu. An dtig leatsa na botúin a aimsiú agus a cheartú?

**1** Cé dó a dtugadh an duais?

---

**2** Cá fhad a dtug tú dó leis an tionscadal a chríochnú?

---

**3** Cá háit a rugadh do sheanathair?

---

**4** Cá huair a fhuair sí amach go raibh an teach le díol?

---

**5** Cá mhéad duais a tugadh amach?

---

**6** Cé a thug cead duit amharc ar na comhaid sin?

---

**7** Cad chuige a théann an oiread sin daoine 'na Spáinne?

---

**8** Caidé leis a raibh tú ag súil?

---

**9** Caidé a mbeidh sibh ag déanamh agus sibh ar saoire?

---

**10** Cén t-am a chonaic tú é?

---

**B** Anois, cruthaigh ceangal idir an dá mhír mar atá déanta sa tsampla thíos.

**Sampla:** Cá háit. Rinne sí an dochtúireacht.  
Cá háit a ndearna sí an dochtúireacht?

- 1 Cad chuige. D’fhan tú sa bhaile inniu. \_\_\_\_\_
- 2 Cá háit. Beidh an dráma ar siúl. \_\_\_\_\_
- 3 Cá huair. Tiocfaidh do chairde ar cuairt. \_\_\_\_\_
- 4 Cé air. Bhí sibh ag caint. \_\_\_\_\_
- 5 Caidé leis. Bheifeá ag dréim ar a leithéid de lá. \_\_\_\_\_
- 6 Cé leis. Beifear ag caint ar an chlár. \_\_\_\_\_
- 7 Cén mhí. Tabharfaidh sibh cuairt orainn. \_\_\_\_\_
- 8 Cé. Foghlaimeoidh na rialacha uilig. \_\_\_\_\_
- 9 Cá huair. Chuala sibh an drochscéal. \_\_\_\_\_
- 10 Cá fhad. Caitheann tú ag staidéar achan lá. \_\_\_\_\_

**C** Aistrigh na habairtí thíos go Gaeilge.

- 1 Why did you postpone the meeting?  
\_\_\_\_\_
- 2 Who was blamed for starting the fire?  
\_\_\_\_\_
- 3 What time will the film start?  
\_\_\_\_\_
- 4 To whom did you send the application?  
\_\_\_\_\_
- 5 How long do the meetings usually last?  
\_\_\_\_\_

## Tusa ag éisteacht

Anois, beidh tú ag éisteacht le beirt ag caint ar na coláistí samhraidh i nGaeltacht Dhún na nGall. Beidh Gráinne ag caint faoi na tréimhsí a chaith sí féin ag freastal ar chúrsaí mar fhoghlaimoír agus beidh Anna ag caint faoin bhaint a bhí aici leis na coláistí samhraidh ina ceantar féin, Machaire Rabhartaigh.

**A** Cad chuige ar luaigh Gráinne na rudaí seo a leanas le linn a cuid cainte?

- Díomá a bheith uirthi:

\_\_\_\_\_

- Tiontú ar an Bhéarla:

\_\_\_\_\_

- Na múinteoirí:

\_\_\_\_\_

- Teanga an tí:

\_\_\_\_\_

**B** Tá botúin eolais i gcuid de na ráitis thíos a bhaineann le cuid cainte Anna. Cuir tic leis na ráitis atá mícheart agus cuir an t-eolas ceart ar fáil.

	Fíor	Bréagach
<b>1</b> Is as an taobh ó thuaidh den tír formhór na scoláirí. _____		
<b>2</b> Maireann achan chúrsa coicís. _____		
<b>3</b> Níor bhac Anna leis na scoláirí go dtí go raibh sí féin timpeall sé bliana déag d'aois. _____		
<b>4</b> Is í a máthair a thug uirthi dul sa tóir ar obair. _____		
<b>5</b> Bhí girseachaí agus gasúraí ag fanacht sa teach ina raibh Anna ag obair. _____		
<b>6</b> Níor thuig Anna ag an am sin caidé a bhí speisialta faoin Ghaeilge nó cad chuige a raibh suim ag daoine sa cheantar. _____		

## Focal ar fhocal

---

An cuimhin leat na leaganacha Gaeilge de na nathanna thíos a bhí in úsáid sna hagallaimh? Pléigh do chuid freagraí leis an duine in aice leat. Thig libh amharc ar an fhíseán arís, más gá.

- 1 We, the visitors weren't fluent enough: Ní raibh \_\_\_\_\_
- 2 We were depending on: Bhí muid \_\_\_\_\_
- 3 The first group: An chéad \_\_\_\_\_
- 4 When we were going to the céilithe: Agus muid ag t\_\_\_\_\_ ar na céilithe.
- 5 We got to know people: \_\_\_\_\_
- 6 That I would have to earn a few pounds: Go \_\_\_\_\_
- 7 She needed a helping hand: Bhí \_\_\_\_\_ de dhíth uirthi.
- 8 You'd be there again in the evening: \_\_\_\_\_ tráthnóna.
- 9 We were in their company: Bhí muid \_\_\_\_\_ ansin.
- 10 Something other teenagers were in search of: Rud inteacht \_\_\_\_\_  
\_\_\_\_\_

## Ardú feasachta: caint nádúrtha

---

Tabhair aird ar na leideanna agus an chomhairle seo a leanas a chuideoidh leat blas níos nádúrtha a chur ar do chuid Gaeilge labhartha.

- 1 Is minic nach mbíonn an *n* le cluinstitín roimh ainmfhocail aonair má thosaíonn an t-ainmfhocal sin le consan. Tá sin iontach soiléir i gcás péirí ainmfhocal mar seo:

lár a' bhaile

le breacadh a' lae

ACH tabhair faoi deara go bhfuaimnítear an *n* a fhuaimniú roimh ghuta nó *f* + guta:

Lár an aonaigh

Ní raibh sí riamh ar an fharraige lá garbh.

- 2 Cailítear gutaí agus consain nuair a ritheann siad isteach ina chéile:

'Antain, goitse anall anseo. (A Antain, goitse anall anseo)

Caithfidh siad ceachtanna 'fháil. (ceachtanna a fháil)

**3** Ní bhíonn an *g* in *ag* i gcónaí le cluinstit roimh chonsan:

Tá mé a' déanamh go mbeidh siad mall.

ACH tabhair faoi deara go mbíonn an *g* le cluinstit roimh ghuta:

Tá mé go maith ag éirí ar maidin.

**4** Is minic a bhíonn guta cúnata le cluinstit i nGaeilge Uladh:

Tá sé ag cur faoi in Alabain. (Albain)

Nach le Soracha an leabhar sin? (Sorcha)

Éist go cúramach anois leis na samplaí sin ar *Aonad 8 Comhad fuaime 1*. Tá achan cheann acu le cluinstit faoi dhó.

Agus sin déanta, éist leis na habairtí thíos ar *Aonad 8 Comhad fuaime 2*. Tá achan abairt acu le cluinstit faoi dhó agus spás idir achan chasadh le go mbeidh am agatsa an abairt a rá.

Moltar duit súil siar a dhéanamh ar na gníomhaíochtaí foghraíochta in *Céim ar Aghaidh* ar bhonn rialta.

Rachaidh tú i dtaithe ar na fuaimeanna agus tiocfaidh feabhas ort de réir a chéile.

- 1** Cad chuige gur mise a chaithfidh na deochanna a cheannacht?
- 2** Tá an babaí úr galánta – tá sí cosúil leis an dream.
- 3** Sheas siad ansin ag amharc uathu.
- 4** Ní fiú duit a bheith ag plásaíocht liom!
- 5** Caithfidh mé duine inteacht a fháil leis an fhéar a ghearradh.
- 6** Déanaim dearmad dá hainm.
- 7** Sin an fhadhb leis an chóras úr, tá sé róchasta.
- 8** A Aoife, cuir scairt orm chomh luath géar is a thig leat.
- 9** Tá siad ag teacht isteach ar an obair de réir a chéile.
- 10** Tá Bríd ina cónaí i mBaile an Droichid anois.



## Cur agus cúiteamh

Léigh an t-alt seo a leanas uair amháin le blaiseadh a fháil den ábhar. Ansin tabhair faoi na tascanna seo a leanas:

- A** Pléigh na nathanna i gcló trom leis na daoine eile i do ghrúpa. Mura dtuigeann sibh an chiall atá leo, an dtig libh comhthéacs an phíosa a úsáid le buille faoi thuairim a thabhairt?

Iarr ar dhuine an focal ‘Gaeltacht’ a mhíniú agus seans láidir gur seo an freagra a gheobhaidh tú: ‘ceann de na ceantair in iarthar agus i ndeisceart na hÉireann ina mbíonn an Ghaeilge á labhairt mar theanga phobail ag cainteoirí dúchais.’ Nuair a smaoiníonn muid ar ‘an Ghaeltacht’, mar sin, is ar *áiteanna* a smaoiníonn muid – Gaoth Dobhair, Gleann Cholm Cille, Rann na Feirste agus a leithéidí. Sin agus cuimhní cinn ar chuariteanna a thug muid ar na háiteanna céanna.

Cuardaigh an focal ‘Gaedhealtacht’ in *Foclóir Gaedhilge agus Béarla* leis an Athair Pádraig Ó Duinnín (1934) agus gheobhaidh tú freagra nach raibh tú ag súil leis, b’fhéidir. Ní ‘áit’ amháin atá sa Ghaeltacht seo, ach staid intinne, **féiniúlacht**, pobal.

‘the state of being Irish or Scotch; Gaeldom, Irishry... Irish-speaking district or districts...  
*Gaedhealtacht Alban*, the Highlands of Scotland.’

Nach aisteach an scéal é? Tugtar ‘Gàidhealtachd’ ar pháirt mhór de thuaisceart na hAlban nach bhfuil Gàidhlig ar bith á labhairt inti. Gaeltacht gan Ghaeilge, mura miste leat. **Focal cleasach** atá san fhocal áirithe seo gan dabht ar bith. Focal cleasach agus **focal maslach**, b’fhéidir. Más ‘Gaeil’ a chónaíonn sa Ghaeltacht, an amhlaidh gur ‘Gaill’ a chónaíonn taobh amuigh di? An bailte ‘**gallda**’ iad lúr Cinn Trá, an Ómaigh, Léim an Mhadaidh? Gabh siar roinnt céadta bliain agus ‘Gael’ a bhí in achan chainteoir Gaeilge. Inniu, is dócha go mbeadh drogall ar dhaoine ‘Is Gael mise’ a rá. Tá blas na seanaimsire air, agus blas beagáinín bródúil fosta – ionann agus a rá gur tusa amháin atá Gaelach.

Tá brí eile leis an fhocal ‘Gaeltacht’, i.e. áit ar bith a labhraítear Gaeilge, fiú mura bhfuil ann ach seal beag gairid. I Meiriceá Thuaidh, tig foghlaimeoirí le chéile fá choinne ‘deirí seachtaine Gaeltachta’ i Stát Nua-Eabhrac, in Toronto agus in áiteanna eile. Sórt ‘**Gaeltacht shealadach inaistrithe**’ a bhíonn ann. Agus cár fhág mé na Pop-Up Gaeltachtaí a bhíonn ag preabadh aníos ó cheann ceann na hÉireann agus ar fud na cruinne? Is maith ann iad, ach an ionann i ndáiríre pobal teanga agus ócáid shóisialta? Thuigfeá don chainteoir dúchais a shílfeadh go bhfuiltear **ag déanamh beag den** ainm ‘Gaeltacht’.

Tá ceist eile ann a chuirfeadh rud beag **gruaim** ort, b’fhéidir. Caidé a dhéanfaidh muid má fhaigheann an Ghaeilge bás i dTír Chonaill, i gConamara, i gCiarraí agus sna dúichí eile inar tháinig sí slán go dtí seo? Más fíor do thráchtairí áirithe, thiocthadh linn ‘**Gaeltacht fhíorúil**’ a chruthú leis an chaillteanas a **chúiteamh**. Gréasán cainteoirí sna bailte móra atá i gceist, chomh maith le comhluadar agus cumarsáid ar líne agus sna meáin shóisialta. Cúiteamh, dar le daoine áirithe. **Sop in aghaidh na scuaibe**, dar le daoine eile.

**B** Pléigh na ceisteanna seo thíos le daoine sa ghrúpa.

- 1** Caidé an chéad smaoineamh a thig isteach i d'intinn nuair a chluineann tú an focal 'Gaeltacht'?
- 2** An síleann tú gur téarma maslach atá in 'Galltacht'?
- 3** Mura bhfuil dúil agat sna téarmaí 'Gaeltacht' agus 'Galltacht', caidé a chuirfeá ina n-áit?
- 4** An mbeifeá sásta 'Gael' a thabhairt ort féin? Cad chuige?
- 5** An bhfuil sé de cheart ag foghlaimeoirí 'Gaeltacht' a thabhairt ar na hócáidí sóisialta a bhíonn ar siúl acu?
- 6** "Beidh deireadh leis an Ghaeilge má fhaigheann sí bás sa Ghaeltacht." An bhfuil tú ag teacht leis an ráiteas sin? Cad chuige?